

Na osnovu Zakona o veterinarstvu u Bosni i Hercegovini („Službeni glasnik BiH“, broj 34/02), članova 4, 6, 7. i 11. Pravilnika o obilježavanju i kontroli kretanja životinja u Bosni i Hercegovini („Službeni glasnik BiH“, broj 13/10, 79/10, 25/11, 103/11, 41/12, 52/15, 02/16 i 66/16), s ciljem unapređenja i efikasnijeg funkcionisanja cjelokupnog sistema identifikacije i praćenja kretanja životinja, ažuriranja baze podataka i prevazilaženja trenutnih neusklađenosti, čime se doprinosi sprečavanju pojava zaraznih bolesti životinja, a time i ljudi, direktor Kancelarije za veterinarstvo Bosne i Hercegovine, donosi

**INSTRUKCIJU
O FUNKCIONISANJU ELEMENATA SISTEMA OBILJEŽAVANJA I KONTROLE KRETANJA
ŽIVOTINJA U BOSNI I HERCEGOVINI**

**Član 1.
(Predmet)**

Ovom Instrukcijom bliže se uređuje funkcionisanje sistema obilježavanja i registracije goveda, ovaca, koza i svinja u Bosni i Hercegovini.

**Član 2.
(Značenje termina)**

Izrazi koji se koriste u ovoj Instrukciji imaju sljedeće značenje:

a) Sistem obilježavanja i kontrole kretanja životinja-podrazumijeva radnje, postupke i procedure za izvođenje poslova koji uključuju obilježavanje, registraciju i kontrolu kretanja životinja (goveda, ovaca, koza i svinja) u Bosni i Hercegovini, izdavanje dokumenata i vođenje evidencija;

b) Obilježavanje životinja – postavljanje identifikacione ušne markice na životinju radi njene identifikacije u skladu sa dobrobiti životinja;

c) Nadležni organ - Ministarstvo poljoprivrede, vodoprivrede i šumarstva Republike Srpske, Federalno ministarstvo poljoprivrede, vodoprivrede i šumarstva i Odjeljenje za poljoprivredu, šumarstvo i vodoprivredu Brčko Distrikta Bosne i Hercegovine, koja su nadležna za implementaciju obilježavanja putem svojih regionalnih kancelarija za unos podataka (u daljnjem tekstu: regionalna kancelarija);

d) Agencije za obilježavanje životinja (u daljnjem tekstu: Agencija)- zadužena za provođenje operativnih aktivnosti u DBP vezanih za registracije imanja i životinja, registracije kretanja, klanja i odjava životinja, kao i drugih aktivnost vezanih za praćenje i održavanje DBP u skladu sa važećom zakonskom regulativom;

e) Državna baza podataka (u daljem tekstu: DBP) – osnovna baza podataka o domaćim životinjama (goveda, svinje, ovce i koze), farmama i vlasnicima u Bosni i Hercegovini iz koje su vidljivi i svi podaci o premještanju životinja koje podliježu registraciji kretanja u skladu sa Pravilnikom o obilježavanju i kontroli kretanja životinja u Bosni i Hercegovini („Službeni glasnik BiH“, broj 13/10, 79/10, 25/11, 103/11, 41/12, 52/15, 02/16 i 66/16) (u daljnjem tekstu: Pravilnik) i ovom Instrukcijom;

f) Kancelarija za veterinarstvo Bosne i Hercegovine– (u daljem tekstu: Kancelarija) upravna organizacija u sastavu Ministarstva spoljne trgovine i ekonomskih odnosa Bosne i Hercegovine, nadležna za provođenje dijela odredbi Pravilnika i ove Instrukcije, putem Agencije,

g) Nadležna veterinarska inspekcija - organ uprave Republike Srpske, Federacije BiH i Brčko Distrikta BiH koji je nadležan za inspeksijske poslove iz oblasti veterinarstva;

h) Ovlašćeni obilježivač – je veterinarska organizacija, uzgajivačka organizacija ili uzgajivač na vlastitom stadu, kojem je Nadležni organ izdao ovlaštenje za obavljanje poslova obilježavanja životinja, putem svojih ovlaštenih veterinarara i obilježivača.

Član 3.

(Odgovornost učesnika u elementima sistema obilježavanja i kontrole kretanja životinja u Bosni i Hercegovini)

(1) Kancelarija će omogućiti posredstvom Agencije pravilno i neprekidno funkcionisanje DBP.

(2) Funkcionisanje obilježavanja, registracije i kontrole kretanja životinja je obezbijeđeno na sljedeći način:

a) obilježavanje životinja, u skladu sa ovom Instrukcijom mogu da obavljaju:

- ovlaštene veterinarske organizacije preko ovlaštenih veterinarara kojima je Nadležni organ odobrio vršenje poslova i preventivnih mjera iz oblasti veterinarstva, zaštite zdravlja i dobrobiti životinja ili

- uzgajivačka organizacija ili uzgajivač u vlastitom stadu preko ovlaštenih obilježivača kojima je Nadležni organ izdao ovlaštenje za obavljanje poslova obilježavanja životinja.

b) pristup i korišćenje podataka u DBP omogućen je svim korisnicima (Nadležnim organima, regionalnim kancelarijama, ovlaštenim inspekcijskim organima, ovlaštenim veterinarskim organizacijama, te drugim zainteresovanim stranama po potrebi) koji sudjeluju u provođenju sistema obilježavanja, registracije i kontrole kretanja životinja u Bosni i Hercegovini, koje je u skladu sa odredbama Pravilnika, odredbama ove Instrukcije i posebnih propisa o zaštiti i tajnosti podataka.

(3) Agencija je obavezna da:

a) pruža tehničku pomoć Nadležnim organima, nadležnim inspekcijskim organima, regionalnim kancelarijama, veterinarskim organizacijama u okviru sistema obilježavanja, registracije i kontrole kretanja životinja u Bosni i Hercegovini;

b) prima, čuva, ažurira, održava i vodi računa o bezbjednosti i zaštiti podataka u DBP.

(4) Nadležnim organima, koji nisu u mogućnosti da preko svog informacionog sistema budu povezani sa DBP, omogućeno je da:

a) kontrolišu za svoje nadležno područje direktne unose u DBP registracije obilježenih životinja i drugih registrovanih aktivnosti za životinje ili

b) kontrolišu unos u DBP svih registrovanih imanja, obilježenih životinja i drugih registrovanih aktivnosti za imanja i životinje, preko pisane forme dobijene od ovlaštenih DVM iz veterinarskih organizacija posredno putem regionalnih kancelarija ili direktnog slanja obrazaca u Agenciju, ukoliko se registracije i druge aktivnosti vode indirektno putem pisane forme na propisanim obrascima;

c) organizuju stručnu obuku ovlaštenim obilježivačima i drugim zainteresovanim stranama koji učestvuju u obavljanju poslova obilježavanja, registracije i kontrole kretanja životinja u Bosni i Hercegovini.

(5) Nadležnim organima za svoje nadležno područje, koji su u mogućnosti da preko svog informacionog sistema budu povezani sa DBP, nakon uspostavljanja svih pravno-tehničkih uslova, omogućeno je da:

a) kontrolišu unos u DBP svih registrovanih imanja, obilježenih životinja i drugih registrovanih aktivnosti za imanja i životinje, u pisanoj formi dobijenu od veterinarske organizacije posredno putem regionalnih kancelarija ili direktnog slanja obrazaca u Agenciju, ukoliko se registracije i druge aktivnosti vode indirektno putem pisane forme na propisanim obrascima;

b) ili kontrolišu unos podataka u DBP putem direktnog korišćenja informacionog sistema nadležnog organa entiteta;

c) organizuju stručnu obuku ovlaštenim obilježivačima i drugim zainteresovanim stranama koji učestvuju u obavljanju poslova obilježavanja, registracije i kontrole kretanja životinja.

(6) Nadležni organ može odrediti da izdavanje propisanih dokumenata donešenih od strane Nadležnih tijela, a koja se primjenjuju u unutrašnjem prometu, vrši elektronskim putem, pod uslovom da je obezbijeđena kontrola izdavanja u skladu sa važećom zakonskom i podzakonskom regulativom BiH i ovom Instrukcijom.

Član 4.

(Odgovornosti i obaveze veterinarske organizacije)

(1) Ovlašćeni veterinari iz veterinarskih organizacija dužni su da prođu obuku o načinu korišćenja baze podataka, koju organizuju Agencija ili Nadležni organ.

(2) Ovlašćeni veterinari iz veterinarskih organizacija unose podatke o životinji na jedan od sljedećih načina:

a) direktnim registrovanjem u DBP, uz identifikaciju pripadajućim korisničkim imenom i lozinkom;

b) direktno putem informacionog sistema Nadležnog organa koji će biti povezan sa DBP, nakon uspostavljanja svih pravno-tehničkih uslova, uz identifikaciju pripadajućim korisničkim imenom i lozinkom;

c) indirektno putem popunjavanja odgovarajućih propisanih obrazaca o obilježavanju, registraciji i kontroli kretanja životinja u pisanoj formi i slanja istih u regionalne kancelarije na unos ili direktnog slanja obrazaca u Agenciju.

(3) Propisane obrasce o obilježavanju, registraciji i kontroli kretanja životinja u pisanoj formi iz stava (2) tačka c) ovoga člana nadležni veterinar popunjava i dostavlja nadležnim na rad prema uputstvu koje se nalazi odštampano na obrascima

Član 5.

(Odgovornost i obaveze vlasnika i držaoca)

(1) Za pravovremeno obilježavanje životinja odgovoran je vlasnik životinja.

(2) Vlasnik životinja dužan je da:

a) prijavi životinju za obilježavanje i odgovoran je za tačnost podataka koji se upisuju u DBP i pasoš;

b) u slučaju krađe životinje, njene smrti ili izvoza prijavi promjenu nadležnoj veterinarskoj organizaciji;

c) u slučaju gubitka ili oštećenja pasoša zatraži od veterinarske organizacije izdavanje novog pasoša.

(3) Vlasnik ili držalac životinja koji vrši prevoz odnosno kretanje životinja na teritoriji Bosne i Hercegovine dužan je:

a) prevoziti samo obilježene životinje;

b) obezbjediti da životinju prilikom kretanja prati pasoš životinje, obrazac C i drugi prateći dokumenti propisani od strane nadležnih organa;

c) radi provođenja poslova veterinarske kontrole omogućiti uvid u propisane prateće dokumente iz stava (3) tačka b), te pokazati životinje i omogućiti osobi koja provodi kontrolu da izvrši očitavanje brojeva ušnih markica na životinji, kako bi se izvršila identifikacija kontrolisane životinje i utvrdila usklađenost pratećih dokumenata sa identifikacionim brojem ušne markice koji je postavljen na životinji;

d) osigurati dobrobit životinja tokom cijelog puta.

(4) Vlasnik životinje obavezan je da prijavi kretanje životinje-polazak životinje sa svoga imanja prije polaska životinje nadležnoj veterinarskoj organizaciji zbog izdavanja obrasca „C“ i drugih pratećih dokumenata i registrovanja promjene (prijave polaska) u DBP. Novi vlasnik životinje obavezan je da prijavi kretanje životinje-dolazak životinje na novo imanje odmah po dolasku životinje nadležnoj veterinarskoj organizaciji radi provjere izdatih dokumenata prilikom prijave polaska životinje i registrovanja promjene (prijave dolaska) u DBP.

(5) Troškove obilježavanja i izdavanja pasoša snosi vlasnik, ukoliko to nije drugačije propisano od strane Kancelarije ili Nadležnog organa.

Član 6. (Obilježavanje životinja nepoznatog porijekla)

(1) Sve životinje bez porijekla (podataka o majci i ocu/roditeljima) će se unijeti u DBP najkasnije u roku od devet mjeseci od dana stupanja na snagu ove Instrukcije.

(2) Na obilježenim životinjama bez porijekla obavezno je izvršiti provjeru zdravstvenog stanja životinja i provođenja svih propisanih mjera na osnovu važećeg programa mjera suzbijanja zaraznih i parazitarne bolesti životinja na teret vlasnika, držaoca ili čuvara životinja, naloženih od strane ovlaštenog službenog veterinara zaposlenog u organima uprave ili veterinarskim organizacijama.

(3) Pri registraciji životinje u DBP pored propisanog Obrasci A1 potrebno je dostaviti i dokument od ovlaštenog veterinara (potvrdu, zapisnik i sl.) direktnim ili indirektnim putem u Agenciju, radi izrade pasoša životinje koji se štampa sa posebnom oznakom "V" na pasošu.

Član 7. (Stupanje na snagu)

Ova Instrukcija stupa na snagu danom donošenja.



DIREKTOR

Saša Bošković, dr vet.med.

Broj: 06-2-02-2-959-4/22

Datum: 28.09.2022